

**Kommune Qeqertalimmi aallaaveqartussamik piniarnermut aalisarnermut
nakkutilliisumik 2023 aallarnerfigalugu atorfeqartitsilernissaq siunertaralugu
Naalakkersuisut peqquneqarnissaannik Inatsisartut aalajangiiffisassaattut
siunnersuut**

Kristian Jeremiassen, Inuit Ataqatigiit saqqummiunneqartoq

aamma

**Nunap immikkoortuini Uummannami Upernavimmilu najugaqartunik piniarnermut
nakkutilliisoqalernissaa sulissuteqaqqullugit Naalakkersuisut peqquneqarnissaannik
Inatsisartut aalajangiiffisassaattut siunnersuut**

Jens Kristian Therkelsen, Siumut saqqummiunneqartoq

pillugit

**Aalisarnermut, Piniarnermut Nunalerinermullu Ataatsimiititaliap
siunnersuutit aappassaaneerpeqarnerannut**

ISUMALIUTISSIISUTAA

Ataatsimiititaliap suliamik suliarinninnermini ilaasortarai:

Inatsisartunut ilaasortaq Hans Aronsen, Inuit Ataqatigiit, siulittaasoq
Inatsisartunut ilaasortaq Jens-Frederik Nielsen, Demokraatit, siulittaasup tullia
Inatsisartunut ilaasortaq Agathe Fontain, Inuit Ataqatigiit
Inatsisartunut ilaasortaq Adam Kristensen, Inuit Ataqatigiit
Inatsisartunut ilaasortaq Jens Kristian Therkelsen, Siumut
Inatsisartunut ilaasortaq Lars Poulsen, Siumut
Inatsisartunut ilaasortaq Hans Enoksen, Naleraq

UKA2022-mi 6. oktober 2022 siullermeerinninnerup kingorna siunnersuutit ataatsimiititaliamit misissorneqarput.

1. Siunnersuutit imarisaat siunertaallu

1.1. UKA2022/31

Piniarnermut aalisarnermullu nakkutilliisumik 2023 aallarnerfigalugu Qasigiannguani pilersitsinissaq siunnersuuteqartup kissaatigaa. Ilaatigut kilisaatip kivinikup Polar Aassikip mingutsitseratarsinnaanera aammalu imeqqutaallat ikiliartornerat siunnersuuteqartup siunnersuuteqarnerminut tunngavilersuutigai. Kommune Qeqertalimmi pinngortitap uumasuisalu paarilluarneqarnissaat siunertarineqarpoq.

1.2. UKA2022/59

Nunap immikkoortuini Uummannami Upernavimmilu piniarnermut nakkutilliisumik pilersitsinissaq siunnersuuteqartup kissaatigaa. Uummannaq Upernavillu nunarujussuup ilaaniipput, aalisarnikkut piniarnikkullu pingaarnertut inuussutissarsiuuteqarfiusut. Taamaattumillu siunnersuuteqartoq naapertorlugu nakkutilliinerup annertunerunissaa najukkami innuttaasunit kissaatigineqarpoq.

2. Siunnersuutit Inatsisartunit siullermeerneqarneri

Imm. 31-p aamma imm. 59-ip siullermeerneqarneranni Naalakkersuisut allannguutissatut imaattumik siunnersuuteqarput:

”Piniarnermut aalisarnermullu nakkutilliisoqarnerup tamakkiisumik nalilersorneqarnissaanut periusissiorfigineqarnissaanullu Naalakkersuisut peqqunneqarnissaannik Inatsisartut aalajangiiffigisassaattut siunnersuut. Nalilersuineq periusissiornerlu UKA 2023-mi Inatsisartunut kingusinnerpaamik saqqummiunneqassaaq. Tassanilu nunap immikkoortuini aaqqissuusseqqinnikkut nakkutilliisoqarnikkullu pitsanngorasaanissat isiginiarneqassallutik.”

Inatsisartut ataatsimiittarfianni siullermeerinninnermi allannguutissatut siunnersuut naliginnaasumik taperserineqarpoq.

3. Ataatsimiititaliap siunnersuummik suliarinninnera

Aalajangiiffigisassatut siunnersuutip imm. 31-p taasisutissartaata kalaallisuuata danskisuuatalu imminnut naapertuutinnginnerat ataatsimiititaliamit aallaqqaasiutigalugu erseqqissaatigineqassaaq. Kalaallisut allaqqasumi amigaataavoq: “...Qasigiannguani”.

Naalakkersuisut allannguutissatut siunnersuutaat imaattoq ataatsimiititaliamit matuma kinguliani isummerfigineqassaaq:

”Piniarnermut aalisarnermullu nakkutilliisoqarnerup tamakkiisumik nalilersorneqarnissaanut periusissiorfigineqarnissaanullu Naalakkersuisut

pequnneqarnissaannik Inatsisartut aalajangiiffigisassaattut siunnersuut. Nalilersuineq periusissiornerlu UKA2023-mi Inatsisartunut kingusinnerpaamik saqqummiunneqassaaq. Tassanilu nunap immikkoortuini aaqqissuusseqqinnikkut nakkutilliisoqarnikkullu pitsanngorsaannissat isiginiarneqassallutik.”

Piniarnermi aalisarnermilu nakkutilliinermi periusissat pillugit iliuusissatut pilersaarusiortoqarnissaa Naalakkersuisut taamaalillutik kissaatigaat, tamatumani nunap immikkoortuini aaqqissuusseqqinneq pitsanngorsaanerlu ilanngunneqassallutik. Iliuusissatut pilersaarut Inatsisartunut UKA2023-mi agguanneqartussatut naatsorsuutigineqarpoq.

Pinngortitap isumagineqarlunilu illersorneqarnissaa naliginnaasumik pisariaqartinneqartoq, tamatumalu inuussutissarsiutigalugu taamatullu sunngiffimmi piniarnermik, aallaaniarnermik aalisarnermillu ingerlatsinissamik periarfissanut ataqatigiissillugu pissasoq ataatsimiititaliaq isumaqarpoq.

Aalajangiiffigisassatut siunnersuutit Naalakkersuisullu allannguutissatut siunnersuutaata assigiinngissutaat pingaarneq tassaavoq aalajangiiffigisassatut siunnersuutit Qasigiannguani, Uummannap Upernaviullu eqqaanni aallaaniarnermut piniarnermullu nakkutilliisumik atorfinitsitsinissamut tunngammata, allannguutissatulli siunnersuutikkut pilersaarut siammasinnerusoq, aaqqissuusseqqissinnaanermik nunallu immikkoortuini imaqartoq, siunniunneqarluni.

Tamatamani Naalakkersuisut takutippaat ukiuni 2021-mi aamma 2022-mi Kalaallit Nunaanni Aalisarsinnaanermut Akuersissutinik Nakkutilliisoqarfimmi aaqqissuusaanikkut allannguinerit atuutilersinneqarsimasut, taamaalillunilu piffiit unioqqutitsiffiunerusinnaasut unioqqutitsinerillu ajoqusii ffiunerusinnaaffiini nakkutilliineq annertunerulluni.

Aalajangiiffigisassatut siunnersuutit akuerineqarnerat 9 mio. kr.-nit missaannik aningaasartuuteqarfiussatut Naalakkersuisunit taggineqarpoq. Naatsorsuineq taanna naapertorlugu Kommune Qeqertalimmi pilersitsinermi aningaasartuutit 2 mio. kr.-ussapput, tamatumalu kingorna ukiumut 1 mio. kr.-t missaaniissallutik. Uummannami Upernavimmilu pilersitsinissamut aningaasartuutit 4 mio. kr.-t missaaniissapput ukiumullu aningaasartuutit 2 mio. kr.-niussallutik. Kalaallit Nunaanni Aalisarsinnaanermut Akuersissutinik Nakkutilliisoqarfik sipaarniaqquneqarsimasoq, taamaammallu kissaatigineqartup maanna aningaasaliissutaasut iluini aningaasanik immikkoortitsiffigineqarnissaa periarfissaqassanngitsoq Naalakkersuisut oqaatigaat.

4. Siunnersuutip aningaasaqarnikkut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Tamanna naapertorlugu siunnersuutip piviusunngortinneqarnerani aningaasatigut kingunerisassat aalajangiiffigisassatut siunnersuutini nalunaarneqarsimasut ataatsimiititaliamit maluginiarneqarput.

Allannguutissatut siunnersuutip aningaasatigut kingunerisassai allassimanngillat.

Tamanna tunngavigalugu Naalackersuisut allannguutissatut siunnersuutaannik akuersissutiginninnermi kingunerisassat aningaasatigut sinaakkutissatut immikkoortinneqareersut iluini isumagineqarsinnaassasut ataatsimiititaliamit ilimagineqarpoq.


Ataatsimiititaliap inassuteqaatai

Naalackersuisut allannguutissatut siunnersuutaat ataatsimiititaliap isumaqatigittup akuerisassanngortippaat.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Hans Aronsen
Siulittaasoq




Jens-Frederik Nielsen
Siulittaasup tullia



Agathe Fontain



Adam Kristensen



Jens Kristian Therkelse



Lars Poulsen



Hans Enoksen